

ռաջ: Խորամանկ Շահաբբաս կռուի ժամանակ միշտ քրիստոնեաներին, այսինքն Հայերին էր առաջ ձգում եւ ստիպում նրանց կռիւ տալ. եւ այսպիսով Թշնամու գնդակները խեղճ Հայերի գլխին էին տեղում: Ալլահվէրդի խան վէզիրը, որին Շահաբբաս ուղարկել էր Արծկէ քաղաքի վրայ, չկարողանալով այդ ամուր բերդն առնել, մտաւ Բղնունեաց գաւառը, Քաջբերունեաց երկիրը, Արճէշ, Վան, եւ բովանդակ աշխարհի մէջ սուր եւ հուր սիրեց, որքան կարողացաւ կոտորեց, մանաւանդ ծերերին եւ մանուկներին, եւ մնացածն ի գերու-
թիւն վարեց: Առաքել Վ.ի վկայութեան համեմատ՝ միայն Բղնունեաց, Առբերանի, Քաջբերունու եւ Տոսպի գաւառներից գերած Հայերի թիւն 23.000 էր, թող կոտորուածները: Այդ բոլոր գերուած ժողովուրդն իրանց գրաստների, ոչխարների եւ ձիերի հետ Ալլահվէրդի խանը բերաւ ածեց Պարսից բանակն եւ Շահաբբաս որոշելով եկաւորներին պանդուխտ բնակիչներից, քշել տուեց առաջիններին Պարսկաստան, իսկ բնիկներին դարձնելով իրանց տեղերը, ծանր հարկեր դրաւ նրանց վրայ:

Երեւանի պաշարման միջոցին, Սրապիոն կաթուղիկոսն այդտեղ էր: Էջմիածնի աթոռի պարտատէր Օսմանցիները վախնալով, որ քաղաքն առնուի եւ իրանց պահանջը կորսուի, բռնեցին Սրապիոնին եւ չարչարելով պահանջում էին Մեղքիսէթի եւ Դաւթի պարտքերն ասելով, թէ այժմ կաթուղիկոսն դու ես: Խեղճ